



Nuuk, 18. marts 2015

UPA2015/84

**Anigaasanoorutit ilai pillugit Kalaallit Nunaannut inatsisip allannguutissaatut akuerineqarnissaa pillugu Inatsisartut aalajangiiffigisassaattut siunnersuut.**

(Aningaasaqarnermut Aatsitassanullu Naalakkersuisoq)

**Siullermeerneqarnera**

Anigaasanoorutit ilai pillugit Kalaallit Nunaannut inatsisip allannguutissaatut akuerineqarnissaa pillugu Inatsisartut aalajangiiffigisassaattut siunnersuut Partii Naleqqamiit imannak oqaaseqarfigissuarput.

Tupinnaqaaq kalaallisut oqaatsitta Inatsisartuni sulinitinni ilaanneeriarluni suusupagineqartassusiat, naak tamanit ilisimaneqaraluartoq Namminersorneq pillugu inatsisikkut qulakkeerneqareeraluartoq kalaallisut oqaatsivut tassaasut pisortatigoortumik oqaatsit.

Taamaakkaluartoq siunnersuummi uani takoqqipparput maanna suliarisatta danskisuaa tamakkiilluinnartumik Inatsisartunut agguanneqarsimavoq, kisiannili kalaallisoriniagaa quppernerit katillugit 88-it, taakkunannga quppernerit sisamat kalaallisuujuupput quppernerillu pingasut kalaallisut danskisullu akuleriinnik allaqqallutik, kalaallisoriniagaata sinneri tamarluinnarmik danskisut allaqqapput, susugununa, pinnguarput?

Soorunami naammaginangitsut siuliani eqqaasakka Inatsisartut Allattoqarfianut saaffiginissutigaaqka aamma tamatuma kingorna suliassanut allanut tunngasut naqqiissutit nassiuqqarput, kisiannili ippassaq aatsaat tunngavilersuummut ilassutimininnguit tiguagut, tassagooq siunnersuummut missingersuutip §§-iisa pingajuat kisimi pineqarmat, taanna kisimi nutserneqarsimasoq.

Tassunga atatillugu Partii Naleqqamiit apeqqtigisariaqarparput, taava soormi §§-i taannaannarlunniit pineqarmat § 3-mi allannguutissat pillugit nassuiaatitai quppernerit arfineq marluk, Kalaallit Nunatsinnut tunngassuteqartut nutserneqarsimangillat?

Taamaammat Partii Naleqqamiit oqaaseqaaterput amigarnerarneqassappat tamanna tupinnartuliatut taaneqarsinnaassanngilaq, akerlianilli aperiinnarsinnaavugut ilumut danskit Inatsisartuini (Folketing-iani) oqaluuserisassat ilaat kalaallisuinngajak allaqqasooq agguanneqaraluarpat qanormita qisuariartoqassagalarpa?

Ilimagiinnarsinnaavarput suliaq taamaattoq Folketing-imi suliarineqarnaviangikkaluartoq?

Tassami kikkulluunniit qinikkat suliaq aaliangiiffigisassamat paasissutissanik tamakkiisunik paasissutissinneqartarnissaat pingaaruteqartorujussuummat.

Taamaamat Partii Naleqqamiit aaliangiiffigisassatut siunnersuut tamakkiisumik maannakkut isummerfiginiangilarput, kisiannili kalaallisut paasissutissamininnguit saqqummiunneqartut tunngavigalugit siullermik suliaq kalaallisoortariniagaani oqaatsit “spillemyndigheden” – “Landsskatteretten” – “Skatteankeforvaltningen” – “Retspræsidenten” - taakku kalaallisut taaguuteqartinneqarpata imaluunniit kalaallisut paasineqarsinnaasumik allatullu ajornassappat ungaluuserlugu nassuiaaserneqassasut Partii Naleqqamiit piunasaqaatigaarput.

§ 12, imm. 1-imut tunngatillugu annerusumik kalaallisut nassuiaaserneqarsimanngimmat oqaatsip “atorfinitinneqannginnermini” taassuma oqaaseqatigiinnik ukunanga “atorfimmut ikkutinneqannginnermini”-mik taarserneqarnissaanik siunnersuut annerusumik niaqorluutissatut takorluunngilarput.

Aamma § 19-imi uku oqaaseqatigiit: “kiisalu aningaasanik peqquserlunnikkut pissarsianik toqqorterisoqarnissaanik pinaveersaartitsineq” – taakku oqaaseqatigiit peerneqarnissaannik siunnersuut isumaqatiginngilarput.

Naggataatigut nalunngilarput inuit nunatsinni ilaat eqquniutit ilaanni aningaasarpassuarnik iluanaaruteqartartut. Siunnersuummi iluanaarutit procent-iat aaliangersimasoq danskit naalagaaffianut nakkartinneqartarpoq.

Tassunga tunngatillugu Partii Naleqqamiit pissusissamisoernerpaatut takorloorparput iluanaarutit pineqartut nunatta karsianut tutsinneqarsinnaanerat Naalakkersuisunit sulissutigineqartariaqartoq.

Taamatut Partii Naleraq sinnerlugu oqaaseqarlunga suliaq aappassanneerlugu aaliangiiffigineqannginnerani ataatsimiititaliami susassaartumi sukumiisumik suliarineqarqinnissaa inassutigaa.

Anthon Frederiksen